

四庫全書

子部

欽定四庫全書

名賢氏族言行類稿卷三十一

宋 章定 撰

周 五百廿五

姓纂帝嚳生后稷至太王邑於周文王以國為氏  
新序周舍事趙簡子立簡子之門三日三夜簡子使人  
問之曰子何以令我周舍曰願為諤諤之臣墨筆操  
牘隨君之後司君之過而書之

國語史伯曰夫成天地之大功者其子孫未嘗不章虞夏商周是也周棄能播殖百穀疏以衣食民人者也其後皆為王公侯伯

史記周勃沛人也以織薄曲為生為人吹簫給喪事材官引彊從高帝攻戰賜爵號絳侯木彊敦厚帝以為可屬大事不好文學椎而少文孝惠時為太尉誅諸呂文帝以為右丞相子亞夫封條侯為將軍軍細柳緩急真可任

周昌沛人也從兄曰周苛苛為御史大夫昌為中尉後  
為御史大夫封汾陰侯 為人彊力敢直言 為人  
吃 期期不奉詔

周緹沛人也常為高祖參乘後為蒯成侯

儒林周堪字少卿齊人事大夏侯勝元帝時擢光祿勳  
後漢周榮字平孫舉明經辟司徒府排奏竇憲由此顯  
名自郾令擢為尚書令後為山陽太守所歷郡縣皆  
見稱紀 子興少有名譽陳忠薦其博物多聞拜為

尚書郎子景字仲饗遷豫州刺史河內太守拔才薦  
善常恐不及每歲時延請舉吏入上後堂宴會數四  
乃遣贈送什物無不充備後為司空舉奏諸宦官姦  
猾皆坐黜朝廷莫不稱之

周章字次叔為郡功曹太守欲私謁竇憲諫不聽前拔  
佩刀絕其馬鞅乃止後舉孝廉

周磐字堅伯居貧養母儉薄不充乃就孝廉之舉及母  
沒公府徵之遂不應後歲朝令其二子曰吾日者夢

見先師東里先生與我講於陰堂之奧豈吾齒之盡  
乎

儒林周防字偉公受尚書明經舉孝廉拜郎中

周舉字宣光姿貌短陋而博學洽聞為儒者所宗京師  
語曰五經縱橫周宣光 舉茂才為平丘令上書言

得失辭甚切直 拜尚書名重於朝廷左右憚之又

遷諫議大夫 遷侍中與八使巡行天下號曰八俊

劾奏貪猾表薦公清朝廷稱之拜光祿大夫卒 朝

廷賜錢十萬以旌委蛇素絲之節 子勰字巨勝時

梁冀貴盛前後三辟竟不能屈自勰曾祖父揚至勰

孫恂六世一時皆知名

酷吏周紆字文通嘗拜洛陽令下車先問大姓主名吏

數閭里豪強以對紆厲聲怒曰本問貴戚輩豈能知

此賣菜傭乎 貴戚跼蹐京師肅清 後為御史中

丞

周澤字穉都拜太常清潔循行盡敬宗廟嘗卧疾齋宮

妻問之澤大怒以妻干犯齋禁收送詔獄謝罪時人語曰生世不諧作太常妻一歲三百六十日三百五十九日齋一日不齋醉如泥

周黨字伯况建武中被徵不得已乃著短布單衣穀皮綃頭待見尚書及引見自陳願守所志遂隱居黽池周嘉字惠文拜零陵太守零陵頌其遺愛吏民為立祠弟暢字伯持為河南尹夏旱因收葬客死骸骨萬餘人應時澍雨



蜀志周羣字仲直嘗占天有徵 為儒林校尉

吳志周瑜字公瑾廬江舒人年二十四吳中皆呼為周  
郎 敗魏師八十萬於赤壁性度恢廓程普曰與公  
瑾交若飲醇醪不覺自醉 文武籌略萬人之英少  
精意音樂謠曰曲有誤周郎顧 建獨斷之明出衆  
人之表 子循循弟胤

周泰字幼平九江人膽氣倍人

周魴字子魚吳郡人嘗舉孝廉為寧國長又為鄱陽太

守謫略多奇卒破曹休斬獲萬計功名當書之竹帛  
在郡十三年賞善罰惡威恩並行

晉書周處字子隱膂力絕人不修細行嘗除去三害遷  
新平太守撫和戎狄雍土美之後轉廣漢太守郡多  
滯訟有經三十年而不決者處詳其枉直一朝決遣  
又遷御史中丞凡所糾劾不避寵戚 子玘字宣佩  
不妄交遊名重一方嘗舉秀才除議郎為吳興太守  
甚有威惠 子颺字彥和終臨淮太守 玘弟札字

宣季 察孝廉除郎中 札兄子筵卓犖有才幹拜

吳興太守

周訪字士達常周窮振乏家無餘財 智勇過人為中

興名將 慨然有平河洛之志 子撫字道和彊毅

有父風遷平西將軍 撫子楚字元孫進冠軍將軍

楚子瓊勁烈有將畧為建武將軍 瓊子虓字孟

威執心忠烈不屈符堅 撫弟光為潯陽太守 光

子仲孫寧州刺史

周浚字開林當移鎮秣陵賓禮故老搜求俊乂甚有威德  
子嵩字仲智 次子謨歷丹陽尹

周馥字祖宣 遷吏部郎選舉精密 為鎮東將軍  
振纓中朝素有俊彥之稱 子密字泰玄時人稱為  
清士位至尚書郎

周顗字伯仁少有重名神彩秀徹 貢嵩見之歎曰汝  
穎固多奇士 拜祕書郎累遷尚書吏部郎後轉尚  
書左僕射 初以雅望獲海內盛名後頗以酒失為

僕射畧無醒日號為三日僕射 王導嘗指其腹答  
曰此中空洞無物然足容卿輩數百人殺諸賊奴取  
金印如斗大 後為王敦所害王導曰吾雖不殺伯  
仁伯仁由我而死幽冥之中負此良友 子閔字子  
騫歷衡陽建安臨川太守

忠義周該 周崎

周顥字彥倫顥之七世孫 宋元徽中詔為郟令有恩  
惠百姓思之 又為山陰令彥倫於鍾山西立隱舍

休沐則歸之 遷中書郎兼著作 轉國子博士太  
學諸生慕其風爭事華辯 孔稚圭作北山移文有  
曰蕙帳空今夜鶴怨山人去兮曉猿驚 長於佛理  
著三宗論言空假義 子捨字昇逸弱冠舉秀才除  
太學博士仕梁累遷鴻臚卿尚書吏部郎雖居職屢  
徙而嘗留省內二十餘年未嘗離左右帝以為有公  
輔器 稱為賢相 歷侍中太子詹事

周弘正字思行捨弟之子年十五補國子生於國學講易

諸生傳習其義 善玄理為世所宗 陳宣帝立授  
右僕射尋敕侍東宮講論語孝經太子以其德望素  
重有師資之敬焉 弟弘讓陳初領太常卿

周弘直字思方仕陳位太常卿 氣調高於次昆或問  
三周孰賢人曰若蜂腰矣 子確字士潜博涉經史  
篤好玄言位都官尚書

周山圖字季寂與人周旋白首不異 在齊累遷鎮北  
司馬轉黃門郎

周盤龍 齊高帝進號右將軍 與其子奉叔大敗魏  
軍父子由是名播北國 形甚羸而臨軍勇果 後  
表年老求解職還為散騎常侍武帝戲之曰卿著貂  
蟬何如兜鍪盤龍曰此貂蟬從兜鍪中生耳 奉叔  
勇力絕人為東宮直閣將軍

周文育字景德 嘗曰取富貴但有大槩耳 累征有  
功除南海令及平侯景累遷散騎常侍 子寶安字  
安人為猛烈將軍文帝寄以心膂精卒多配焉



周鐵虎嘗平侯景定建鄴錄前後功進爵為侯

周敷字仲遠為郡豪族 膽力勁果超出時輩輕財重

士後為安西將軍

周炆字文昭豪俠任氣有將帥才以軍功遷江州刺史  
文學周興嗣字思纂嘗宿逆旅夜有人謂曰子才學邁  
世初當見識貴臣卒被知英主後為給事中

隱逸周續之字道祖通五經五緯號曰十經名冠同門  
閒居讀老易隱於廬山徵命並不就

北史周幾代人也 太武以其有智勇遣鎮河南威信  
著於境外

周觀代人驍勇有膂力

周搖字世安仕隋為幽州總管修郭塞謹斥堠邊人安  
之

周羅暉字公布仕陳為句容令後與齊師戰勇冠三軍  
除右軍將軍 又出為晉陵太守進爵為侯

周法尚字德邁少果勁有風槩好讀兵書仕隋拜巴州

刺史破三鵠叛蠻復擊走陳冠遷衡州總管

唐周允元豫州人同平章事武后宴宰相詔陳書傳善言允元曰耻其君不如堯舜

周墀字德升汝南人及進士第長史學屬辭高古遷起居舍人時帝御紫宸召左右史咨質所宜墀最為天子欽矚俄知制誥武宗即位拜義城節度使宿將暴誓不循令者墀命鞭其背一軍大治

周曾本李希烈部將與王玠姚韋清志相善號四公

子

五代周德威字鎮遠朔州馬邑人也為人勇而多智能望塵以知敵數其狀貌雄偉笑不改容人見之凜如也事晉王為騎將小字陽五當梁晉之際周陽五之勇聞天下梁軍圍晉太原下令軍中曰能生得周陽五者為刺史有驍將陳章者號陳野义常乘白馬被朱甲以白異出入陣中求欲必生致之德威因戒其部兵曰見白馬朱甲者當佯走以避之兩軍皆陣德

威微服雜兵伍中陳章出挑戰兵始交德威部下見  
白馬朱甲者因退走章果奮稍急追之德威伺章已  
過揮鐵鉞擊之中章墮馬遂生擒之以破夾城功拜  
振武節度使梁遣王景仁將兵擊趙趙乞師於晉莊  
宗自將出贊皇會德威於石橋進距柏鄉五里營野  
河北晉兵少而景仁所將神威龍驤拱宸等軍皆梁  
精兵人馬鎧甲飾以組繡金銀其光耀日晉軍望之  
色動德威勉其衆曰此汴宋販兒徒飾其外耳其中

不足懼也其甲之直數十千得之適足為吾資無徒望而愛之當勉以往取也退而告於莊宗曰梁兵甚銳未可與爭宜少退以待之莊宗曰吾提孤軍出千里其利速戰今不乘勢急擊之使敵知吾之衆寡則吾無所施矣德威曰不然趙人能城守而不能野戰吾之取勝利在騎兵平原廣野騎兵之所長也今吾軍於河上迫賊營門非吾用長之地也莊宗不悅退卧帳中諸將無敢入見德威謂監軍張承業曰王怒

老兵不速戰者非法也且吾兵少而臨賊營門所恃者一水隔耳使梁得舟楫渡河吾無類矣不如退軍鄆邑誘敵出營擾而勞之可以坐勝也承業入宮曰德威老將知兵願無忽其言莊宗遽起曰吾方思之耳已而德威獲梁遊兵問景仁何為曰治舟數百將以為浮梁德威引與俱見莊宗笑曰果如公所料乃退軍鄆邑德威晨遣三百騎叩梁營挑戰自以勁兵三千繼之景仁怒悉其軍以出與德威轉鬪數十里

至於鄆南兩軍皆陣梁軍橫亘六七里汴宋之軍居西魏滑之軍居東莊宗策馬登高望而喜曰平原淺草可前可却真吾之勝地也乃使人告德威曰吾當為公先公可繼進德威持馬諫曰梁軍輕出而遠來與吾轉戰其來必不暇齎糧糗縱其能齎亦不暇食不及日午人馬俱饑因其將退而擊之勝諸將亦皆以為然至未申時梁軍東偏塵起德威鼓譟而進麾其西偏曰魏滑軍走矣又麾其東偏曰梁軍走矣梁



陣動不可復整乃皆走遂大敗自鄆追至於柏鄉橫尸數十里景仁以十餘騎僅而免劉守光僭號於燕晉遣德威將兵三萬出飛狐以擊之以功拜盧龍軍節度使莊宗勇而好戰尤銳於見敵德威老將常務持重以挫人之鋒故其用兵常伺敵之隙以取勝十五年德威將燕兵三萬人與鎮定等軍從莊宗於河上自麻家渡進軍臨濮以趨汴州軍宿胡柳陂黎明候騎報曰梁軍至矣莊宗問戰於德威德威對曰此

去汴州信宿而近梁軍父母妻子皆在其中而梁人  
家國繫此一舉吾以深入之兵當其必死之戰可以  
計勝而難與力爭也且吾軍先至此糧爨具而營柵  
完是謂以逸待勞之師也王宜按軍無動而臣請以  
騎軍擾之使其營柵不得成樵爨不暇給因其勞乏  
而乘之可以勝也莊宗曰吾軍河上終日俟敵今見  
敵不擊復何為乎顧李存審曰公以輜重先吾為公  
殿遽督軍而出德威謂其子曰吾不知死所矣明宗

時加贈太尉配享莊廟晉高祖追封德威燕王子光  
輔官至刺史

周知裕字好問幽州人也為劉仁恭騎將奔梁為歸化  
軍指揮使梁晉相距河上十餘年其推堅陷陣歸化  
一軍為最莊宗入汴知裕降莊宗尤寵待之為房州  
刺史明宗時歷絳淄二州刺史遷宿州團練使安州  
留後所居皆有善政

宋朝周行逢武陵人也周世宗授武平軍節度使國初

加兼中書令行逢在鎮盡心為治所用官屬率皆廉  
介之士條教簡約民皆悅之行逢既為帥夫人不為  
屈不入府治躬率奴僕耕織以自給賦調必先期輸  
送行逢止之不從曰稅官物也若主帥自免何以率  
下乎

周起字萬卿淄州鄒平人也母得吉夢而生起父異之  
謂必大其門因名之曰起舉進士累擢知制誥真宗  
東封還自泰山羣臣多獻文章以頌德起獨上書言

天下之勢常患恬於安逸而忽於兢業願陛下毋以告成為恃真宗嘉之起素患貢舉之弊因建議糊名以革之至今為著令知開封府聽斷明審廷無留事仁宗初降誕起方奏事真宗謂曰知朕有喜乎起曰臣不知也真宗曰朕始生子即入禁中懷出金錢賜起出知河中府拜給事中同知樞密院事既而又為禮侍樞密副使卒謚安惠

周堯卿字子俞其先汝陰人也後徙居荊州之南堯卿

警悟彊記以學行知名舉進士知高安寧化二縣提  
點刑獄楊紘入境有被刑而耘苗者紘就詢其故對  
曰貧以利故為人直其枉令不我欺而我欺之我又  
何怨紘至邑以所聞薦之後通判饒州積官至太常  
博士慶厯間范仲淹舉經行可為師表未及用而卒  
始堯卿年十二喪父憂戚如成人兄弟尤篤友愛執  
母喪倚廬三年席薪枕塊雖疾病不飲酒食肉既葬  
慈烏百數銜土集隴上人以為孝感所致為人簡重

不校有嫚已者必厚為禮以愧之居官祿雖薄必以周宗族朋友罄而後已

周邦彥字美成錢塘人也性落魄不羈涉獵書史元豐初獻汴都賦神宗異之自諸生命為太學正紹聖中除秘書省正字徽宗即位為校書郎遷衛尉卿出知龍德府召為秘書監擢徽猷閣待制提舉大晟府未幾知真定改順昌府提舉洞霄宮卒邦彥能文章世特傳其詞調云

周文之未知其名定家藏東坡先生與文之別紙真墨  
載之於此軾近蒙寄示畫圖及新堂面勢仍求榜名  
嶺南無大寒甚暑秋冬之交勾萌盜發春夏之際柯  
木潛改四時之運默化而人不知民居其間衣食之  
奉終歲一律寡而易安有足樂者若吏治不煩即其  
所安而與之俱化豈非牧養之妙手乎文之治循似  
用此道故以默化名此堂如可用便請題榜也

周武仲字憲之浦城人紹聖中登進士第後擢監察御



史差報金國信使金恃強背約公不為之屈回至雄  
州上疏歷言金國貪詐背違元約本朝輕用謀臣言  
與通使未為得計宜詔大臣深謀所以禦戎之策送  
伴至燕山當賜宴金使欲先向北謝然後南向拜恩  
武仲力爭之擢御史中丞武仲知邊隙已開國家失  
計已久首建明屢省乃成之語以為戒上悟因稱雄  
州所上疏武仲云今無如之何唯當內修政事耳上  
因諭之曰前此趙良嗣言金人有威有信可以永遠

為援賴是差卿去不爾無緣得知建炎之初召除吏  
侍宣取雄州之疏遍示大臣仍褒諭之除龍圖閣學  
士奉祠卒龜山先生誌其墓

周嗣武武仲之從孫椿年之子也用祖因蔭補官嘗歷  
太府丞出提舉江西常平移憲湖北召除尚書郎使  
蜀稽考財計還入對上勞之曰往來萬里宣力甚多  
除太府少卿總餉湖廣居職最久陞太府卿召除戶  
侍卒子庭筠前監進奏院

丘

五百廿六

姓纂齊太公封於營丘支孫以地為姓代居扶風

說苑孔子行遊中路見丘吾子擁鐺帶索而哭孔子問  
曰夫子何哭之悲也丘吾子曰吾有三失吾少好學  
問周遍天下還沒吾親一失也事君奢驕諫不遂二  
失也厚交友而後絕三失也請從此辭孔子曰此足  
為戒也於是弟子歸養親者十三人

南史文學丘靈鞠吳興人少好學善屬文褚顏回曰此

郡才士唯有丘靈鞠仕梁領東觀祭酒曰人居官願  
數遷使我終身為祭酒不恨也在宋時文名甚盛

子遲字希範辭采麗逸點綴映媚似落花依草拜中

書侍郎從孫仲孚字公信王儉曰東南之美復見

丘生遷山陰令甚有聲稱百姓謠曰二傅沈劉不如

一丘長於撥煩號稱神明政為天下第一遷豫章內

史更勵清節

丘巨源蘭陵人少舉孝廉後除武昌太守不樂曰古人

云寧飲建鄴水不食武昌魚乃以為餘杭令

孝義丘傑字偉跼吳興人十四遭喪以熟菜有味不嘗  
於口

北史丘堆初以忠謹入侍明帝立拾遺左右

唐丘和河南洛陽人歷資梁蒲三州刺史以寬厚著名  
善撫吏士得其心大業末海內苦吏侵數怨畔帝以  
和所莅稱淳良而黃門侍郎裴矩亦薦之拜交趾太  
守撫接盡情荒憬安之

丘行恭有力善騎射聚兵保郿城人多依之盜不敢窺  
境累從戰功多錫勞甚厚所守嚴烈僚吏畏之太宗常  
思其功初討王世充流矢著太宗馬行恭回射之發  
無虛鏃賊不敢前遂下拔箭以已馬進太宗步執長  
刀大呼導之斬數人突陣而還貞觀中詔斷石為人  
馬象拔箭狀立昭陵闕前旌武功

優 五百廿七

姓纂史記優孟樂人也子孫氏焉

史記滑稽優孟故楚之樂人也長八尺多辯常以談笑  
諷諫

優旃者秦倡朱儒也善為笑言然合於大道

鄒五百廿八

姓纂子姓宋愍公之後正考父食邑於鄒生叔梁紇  
遂為鄒氏齊有鄒衍鄒忌

新序鄒忌以鼓琴見齊宣王善之鄒忌曰夫琴所以象  
政也遂為王言琴之象政狀

史記鄒陽齊人也獄中上梁孝王書王使人出之卒為  
上客 太史公曰鄒陽辭雖不遜然其比物連類有  
足悲者亦可謂抗直不撓矣 文辯著名長裾曳王  
門為人有知略慷慨不苟合 獄中書云明月之珠  
夜光之璧以闇投人於道莫不按劍相眄者無因至  
前也

鄒衍事燕惠王左右譖之被繫於獄仰天而哭盛夏天  
為之降霜



晉文苑鄒湛字潤甫南陽人少以才學知名累遷為國  
子祭酒鄒湛之持論實南陽之人傑 子捷字太應  
亦有文才為散騎侍郎

宋朝鄒浩字志完常州晉陵人也舉進士召對除右正  
言時既已廢孟后遂立劉氏為皇后浩上疏哲宗怒  
除名新州羈管徽宗即位移袁州酒稅尋召還復為  
右正言遷司諫改起居舍人拜中書舍人歷吏部兵  
部侍郎以寶文閣待制知江寧府改杭越二州大觀

元年復直龍圖閣自章表還親側凡六年而卒

鄒應龍字景初武邵泰寧人徽之子也紹熙丙辰擢進士第一人今為部侍郎衡之子應麟應傳俱繼登第

樓 五百廿九

姓纂夏少康之後周封杞東樓公支孫以樓為氏秦有相樓緩

新序秦趙戰於長平趙王計未決樓緩從秦來趙王與樓緩計之

前漢游俠樓護字君卿齊人結士大夫無所不傾為人  
短小精辯議論常依名節聽之者皆竦與谷永俱為  
五侯上客長安號曰谷子雲筆札樓君卿唇舌舉方  
正為諫大夫使郡國奏事稱意擢天水太守

後漢儒林樓望字次子習嚴氏春秋操節清白有稱鄉  
閭教授不倦世稱儒宗永平初為侍中入講省內  
南史隱逸樓惠明字智遠有道術居金華山徵召並不  
至

仇 五百三十

姓纂左傳宋大夫仇牧之後


後漢仇覽字季智

一名香

為蒲亭長勸人生業農事畢迺

令子弟還就黌學期年稱大化有陳元者母告其不孝覽驚云云迺到元家與其母子飲為陳人倫孝行譬以禍福元卒成孝子鄉邑諺曰父母何在在我庭化我鷗臬哺所生 考城令王渙署覽為主簿謂曰主簿聞陳元之過不罪而化之得無少鷹鷂之志邪

覽曰鷹鷂不若鸞鳳渙謝遣之曰枳棘非鸞鳳所棲  
百里豈大賢之路



名賢氏族言行類稿卷三十一

欽定四庫全書

子部

名賢氏族言行類稿卷三十三

詳校官典籍

臣潘奕雋

主事

臣祁韻士覆勘

總校官進士

臣朱

鈴

校對官中書

臣張

曾炳

謄錄監生

臣史

殿榮

欽定四庫全書

名賢氏族言行類稿卷三十二

宋 章定 撰

游

五百三一

姓纂左傳鄭穆公子偃字子游後以王父字為氏春  
秋氏族圖鄭國游氏子游子太叔公孫楚游速

左傳成公六年鄭伯如晉拜成子游相授玉於東楹之東  
襄公二十四年晉侯使張骼致楚師求御於鄭鄭人卜

宛射犬吉子太叔戒之曰大國之人不可與也

定公六年鄭游速帥師滅許以許男斯歸

北史游雅字伯度太武時知名徵拜中書博士出為

雍州刺史在任廉白甚有惠政徵為秘書監從祖弟

明根字志遠嘗於白渠坎為窟讀書積歲餘太武擢

假散騎常侍使宋宋孝武稱其長者迎送禮加常使

遷兗州刺史為政清平為儀曹長清約恭謹致仕為

五更凡國有大事恒璽書訪之歷官內外五十餘年



處身以仁和接物以禮讓時論貴之 子肇字伯始

博綜經史謙素敦重文雅見任帶魏郡太守為政清  
簡為畿內大使黜陟善惡賞罰分明歷御史中尉直  
繩所舉莫非傷風敗俗於吏事斷決反覆至於再三  
然後下筆雖寵勢干請終無回撓方正之操時人服  
之 子祥字宗良

節義游元字楚客仕周歷壽春令譙州司馬俱有能名  
宋朝游酢字定夫建州建陽人也兄醇與酢俱以文行

知名酢初受業於程顥顥知扶溝縣以道學為已任  
酢為掌其事由是學問益進又事程頤頤器之舉進  
士為蕭山尉除博士僉判泉州召為監察御史尋知  
和州又知漢陽軍歷舒濠二州寓居歷陽卒陳正同  
知建寧因立像設祠於學而屬晦菴朱公燾記其事  
曰先生遠矣學者登是堂而拜其像於是記也考其  
師友之淵源退訪其書而讀之於以求先生之所以  
學者果惡乎在幸而他日得之則亦無以異乎親而

炙之矣詩曰人之好我示我周行又曰高山仰止景  
行行止熹雖不敏願與承學之士勉焉以無忘陳公  
之德晦菴所謂退訪其書而讀之即公所著易說詩  
二南義中庸義論語孟子雜解也

游子操字存誠有家學宣和三年擢進士第紹興中遷  
祕書少監權禮部侍郎晚居盱江奉祠卒

游師雄字景升京兆武功人也舉進士久之除宗正寺  
主簿遷軍器監丞吐蕃寇邊朝廷擇可使者與邊臣

措置以師雄行聽以便宜從事既至請於帥劉舜卿  
分兵為兩道姚兕將而左神誼將而右兕破六逋宗  
城攻講朱城斷莫河飛橋青唐十萬家不得度誼遂  
破洮州擒鬼章及大酋領以師雄為陝西轉運判官  
後還秦移陝州以卒

牛

五百三二

姓纂宋微子之後司寇牛父子孫以王父字為氏戰  
國時趙有牛剪秦有牛缺

北史牛弘字里仁安定鶉觚人好學博聞仕周歷內史  
上士專掌文翰修起居注仕隋授祕書監表請開獻  
書之路拜禮部尚書上明堂議除太常卿作樂府歌  
并議樂事拜吏部尚書先德行後文才所有進用並  
多稱職隋室舊臣始終信任悔吝不及唯弘一人而

已

隋書亦有傳

唐牛仙客涇州人初為縣小史令傅文靜器之河西節  
度使王君奭召為判官清勤不懈接士大夫以信蕭

嵩薦為涼州節度使始在河西畵事省用倉庫積鉅萬器械犀銳帝悅

牛僧孺字思黯隋僕射奇章公弘之裔幼孤下杜樊鄉有賜田數頃依以為生工屬文第進士元和初以賢良方正對策第一條指失政其言鯁直不避宰相宰相怒故楊於陵鄭敬韋貫之李益等坐考非其宜皆謫去穆宗初徙御史中丞按治不法內外澄肅宿州刺史李直臣坐賕嘗賂宦侍為助具獄上帝曰直臣

有才朕欲貸而用之僧孺曰彼不才者持祿取容耳  
天子制法所以束縛有才者祿山朱泚以才過人故  
亂天下帝異其言乃止賜金紫服以戶部侍郎同中  
書門下平章事始韓弘入朝其子公武用財賂權貴  
杜塞言者俄而弘公武卒孫弱不能事帝遣使者至其  
家悉收貲簿校計出入所以餉中朝臣者皆在至僧  
孺獨注其左曰某月日送錢千萬不納帝善之謂左  
右曰吾不謬知人繇是遂以相尋遷中書侍郎敬宗

立進封奇章郡公是時政出近倖僧孺數表去位授  
武昌節度使同平章事鄂城土惡亟圮歲增築賦蓂茅  
於民吏倚為擾僧孺陶甕以城五年畢鄂人無復歲  
費文宗立李宗閔當國屢稱僧孺賢不宜棄外復以  
兵部尚書平章事幽州亂楊志誠逐李載義帝不時  
召宰相問計僧孺曰是不足為朝廷憂夫范陽自安  
史後國家無所繫休戚前日劉總挈境國荒財耗力  
且百萬終不得范陽尺帛斗粟入天府俄復失之今志



誠繇向載義也第付以節使扞奚契丹彼且自力不足  
以逆順治也帝曰吾初不計此公言是也因遣使慰撫  
之進門下侍郎弘文館大學士是時吐蕃請和約弛兵而  
大酋悉怛謀舉維州入之劍南於是李德裕上言韋臯經  
略西山至死恨不能致今以生羌三千人燒十三橋擣虜  
之虛可以得志帝使羣臣大議請如德裕策僧孺持不可曰  
吐蕃綿亘萬里失一維州無害其疆今修好使者尚未至遽  
反其言且中國

禦戎守信為上應敵次之彼來責曰何故失信贊普  
牧馬蔚茹川若東襲隴坂以騎綴回中不三日抵咸  
陽橋則京師戒嚴是雖得百維州何益帝然之遂詔  
返降者中尉王守澄引纖人竊議朝政他日延英見  
宰相曰公等有意於太平乎何道以致之僧孺曰臣  
待罪宰相不能康濟然太平亦無象今四夷不內擾  
百姓安生業私室無彊家上不壅蔽下不怨讟雖未  
及至盛亦足為治矣而更求太平非臣所及退謂他

宰相曰上責成如是吾可久處此耶固請罷乃檢校  
尚書左僕射同平章事為淮南節度副大使天子既  
急於治故李訓等投罅得售其妄幾至亡國司馬溫  
公曰君明臣忠上令下從俊良在位佞邪黜遠禮修  
樂舉刑清政平姦宄消伏兵革偃戢諸侯順附四夷  
懷服時和年豐家給人足此太平之象也於斯之時  
閹寺專權脅君於內弗能遠也藩鎮興兵陵慢於外  
弗能制也士卒殺逐主帥拒命自立弗能詰也軍旅

歲興賦歛日急骨血縱橫於原野杼軸空竭於里閭  
而僧孺謂之太平不亦誣乎當文宗求治之時僧孺  
位居承弼進則偷安取容以竊位退則欺君誣世以  
盜名罪孰大焉僧孺治第落之歸仁里多致嘉石美  
木與賓客相娛樂為山南東道節度使賜彛樽龍勺  
詔曰精金古器以比況君子卿宜少留僧孺固請乃  
行子蔚叢最顯

蔚字大章老以右僕射致仕子徽

徽舉進士累擢吏部員外郎乾符中選濫吏多姦歲調  
四千員徽治以剛明柅杜干請法度復振蔚避地於  
梁道病徽與子扶藍輿歷閣路盜擊其首血流面持  
輿不息盜迫之徽拜曰人皆有父今親老而疾幸無  
駭驚盜感之乃止及前谷又逢盜輒相語曰此孝子  
也共舉輿舍之家進帛裹創以饘飲奉蔚留信宿去  
抵梁徽趨蜀謁行在丐歸侍親疾會拜諫議大夫固  
辭見宰相杜讓能曰上遷幸當從親有疾當侍而徽

兄在朝廷身乞還營醫藥時兄循已位給事中許之  
父喪客梁漢終喪以中書舍人召辭疾改給事中留  
陳倉張濬伐太原引為判官敕所在敦遣徽太息曰  
王室方擾倉藏殫耗當協和諸侯以為藩屏而又濟  
以兵諸侯離心必有後憂不肯起濬果敗復召為給  
事中楊復恭叛山南李茂貞請假招討節伐之未報  
而與王行瑜輒出兵昭宗怒持奏不下茂貞亟請帝  
召羣臣議無敢言徽曰王室多難茂貞誠有功今復

恭阻兵而討之罪在不俟命爾臣聞兩鎮兵多殺傷  
不早有所制則梁漢之人盡矣請假以節明約束則  
軍有所畏帝曰然乃以招討使授茂貞果有功然益  
偃蹇帝使宰相杜讓能將兵誅討徽諫曰岐國西門  
茂貞憑其衆而暴若令萬分一不利屈威重奈何願  
徐制之不聽師出帝復召徽曰今伐茂貞彼衆烏合  
取必萬全卿計何日有捷對曰臣職諫爭所言者軍  
國大體如索賊平之期願陛下考著龜責將帥非臣

職也既而師果敗遂殺大臣王室益弱以刑部尚書致仕歸樊而卒

叢字表齡第進士繇藩帥幕府任補闕數言事會宰相請廣諫員宣宗曰諫臣惟能舉職為可奚用衆耶今張符趙璘牛叢使朕聞所未聞三人足矣

宋朝牛存節字贊止貴州博昌人也初事諸葛爽於河陽爽卒存節顧其徒曰天下洶洶當得英雄事之乃率其徒十餘人歸於太祖存節為人木彊忠謹太祖



愛之後以戰功拜亳宿二州刺史為將法令嚴整而  
善得士心卒贈太師

侯 五百三三

姓纂晉侯縉之後適他國以侯為氏鄭有侯宣多侯  
多羽魯有侯叔下侯犯齊有侯朝魏有侯羸

後漢侯霸字君房河內人為臨淮太守更始徵之百姓  
老弱相攜號哭遮使者車或當道而卧皆曰願乞侯  
君復留暮年

侯瑾字子瑜常以禮自牧獨處一房如對嚴賓作矯世  
論以譏切當時西河人敬其才而不敢名之皆稱為  
侯君

晉書侯史光字孝明東萊人舉廩州辟別駕用為御史  
中丞所以伸其司直之才厲志守約有忠清之節儒  
學博古歷官著績文章奏議皆條理

南史侯瑱字伯玉以敗侯景之功除豫州刺史

侯植字仁幹少儻有大節武藝絕倫仕魏為義州刺

史甚有政績

唐侯君集幽州三水人以材雄稱少事秦王幕府從征討有功貞觀四年檢校吏部尚書參議朝政李靖討吐谷渾以君集為磧石道行軍總管師次鄯州議所向君集曰王師已至而賊不走險天贊我也若以精兵掩不備彼不我虞必有大利若遁阻山谷克之實難靖然其計簡銳士約齋采入追及其衆於庫山谷大戰破之進會大非川平其國進吏部尚書君集本

以行伍奮不知學後貴益自喜好書及典選分明課  
最有譽於時吐蕃圍松州授當彌道行軍大總管以  
擊之高昌不臣拜交河道行軍大總管出討王麴文  
泰笑曰唐去我七千里磧鹵二千里無水草冬風裂  
肌夏風如焚行賈至者百之一安能致大兵乎使能  
頓吾城下一再旬食盡當潰吾且係而虜之君集次  
磧口而文泰死子智盛襲位進營柳谷候騎言國方  
葬死君諸將請襲之君集曰不可天子以高昌驕慢

使吾恭行天罰今襲人於墟墓間非問罪也於是鼓  
而前賊嬰城自守遣諭之不下乃刊木塞塹引撞車  
毀其堞飛石如雨所向無敢當因拔其城俘男女七  
千進圍都城初文泰與西突厥欲谷設約有急相援  
及是欲谷設益懼西走智盛失援乃降高昌平君集  
刻石紀功還初君集配沒罪人不以聞又私取珍寶  
婦女將士因亦盜入不能制及還京師有司劾之詔  
君集詣獄簿對中書侍郎岑文本諫曰古者出師克

敵有重賞不勝蒙顯戮當其有功也雖貪財縱欲尚蒙爵邑其無功也雖勤躬潔已不免缺鉞故日記人之功忘人之過宜為君者也昔李廣利貪不愛卒陳湯盜所收康居財物二主皆赦其罪封侯賜金夫將帥之臣廉慎少而貪墨多軍法曰使智使勇使貪使愚故智者樂立其功勇者好行其志貪者邀趨其利愚者不計其害是以前聖使人必收所長而棄所短陛下宜申宥君集俾復朝列以勸有功帝悟釋不問

始帝命李靖教君集兵法既而奏靖且反兵之隱微  
不以示臣帝以讓靖靖曰方中原無事臣之所教足  
以制四夷而求盡臣術此君集欲反耳靖為右僕射  
君集為兵部尚書同還省君集馬過門數步乃覺靖  
語人曰君集其有異慮乎後果如言

侯希逸營州人長十尺破賊數有功

侯知道居親喪穿墻作冢皆身執其勞李華作贊表其  
行

宋朝侯蒙字元功高密人也舉進士遷侍御史西夏寇邊高永年死於羌徽宗怒親書五路帥臣劉仲武等十八人姓名命蒙制勘於秦州既行拜給事中蒙至仲武等囚服聽命蒙謂曰君等皆侯伯不敢以獄事辱第言其實案未上除御史中丞蒙因上言曰漢武之殺王恢不如秦穆之赦孟明子玉縊而晉侯喜孔明斃而蜀國輕羌既殺吾一都護而使十八將由之而死是自戕其支體欲身之不病其可得乎徽宗即



日赦仲武等政和二年除中書侍郎張商英為相御  
史中丞蔡疑力詆其私事商英丐罷且辯其誣有旨  
與疑辨蒙曰商英雖有罪宰相也蔡疑雖言官從臣  
也今使之廷辯豈不有傷國體哉徽宗然之

婁

五百三四

姓纂風俗通邾婁國之後子孫以婁為姓左傳齊大  
夫婁檉齊國漢常奉春君婁敬改封建信侯賜姓  
劉氏

前漢婁敬後賜姓劉

事見劉姓門

南史隱逸婁幼瑜字季玉聚徒教授不應徵辟著禮據

拾三十卷

北史婁伏連代人也代為酋帥忠厚有器量於魏明元

時為晉兵將軍并州刺史子真弟大拔孫寶字道

成性淳朴好讀書明帝時仕至朔州刺史歲考為天

下最後授國子祭酒兼太子太傅為人清簡少言頗

諳舊事位歷師傅守靖謙恭以此為人所敬後行涇

州事卒

婁昭字菩薩方雅正直有大度深謀 齊神武起昭贊  
成大策為中軍大都督後為定州刺史 兄子叡字  
佛仁為瀛州刺史

節義婁提魏獻文崩提謂人曰聖主昇遐安用活為遂  
引佩刀自刺幾死

唐婁師德字宗仁鄭州人第進士調江都尉揚州長史  
盧承業異之曰子台輔器也 上元初使吐蕃喻國

威信間陳利害吐蕃畏悅後募勇士討吐蕃乃自戴  
舊紅抹額來應詔與虜戰白水澗八遇八克天授  
初檢校豐州都督率士屯田積穀數百萬無轉餼和  
糴之費深沉有度量人有忤已輒遜以自免不見容  
色其弟守代州辭之官教之耐事弟曰人有唾面潔  
之乃已師德曰未也潔之是違其人之怒正使自乾  
耳狄仁傑未輔政師德薦之及同列數擠令外使  
武后覺問仁傑曰師德賢乎對曰為將謹守賢則不

知又問知人乎對曰臣嘗同僚未聞其知人也后曰  
朕用卿師德薦也誠知人矣出其奏仁傑慙歎曰婁  
公盛德我為所容乃不知吾不逮遠矣總邊要為將  
相者三十年恭勤樸忠無適莫方酷吏殘鷙人多  
不免獨能以功名始終與郝處俊相亞世之言長者  
稱婁郝

年 五百三五

姓纂風俗通云牟子國祝融之後漢有太尉牟融

後漢牟融字子優以尚書教授門徒數百人以茂才為  
豐縣令無獄訟為州郡最為司隸多舉正百僚敬憚  
之後為司徒舉動方重甚得大臣節

牟長字君高習書諸生講學者常有千餘人

州 五百三十六

風俗通晉有州綽州賓其先食采於州因氏焉衛有  
公子州吁漢有州輔魏有州秦

舟 五百三七

晉大夫舟之僑之後

攸 五百三八

北燕有尚書攸邁

由 五百三九

西戎由余相秦子孫氏焉楚大夫王孫由干之後亦為

由氏

駟 五百四十

閩越王無諸之後

求 五百四一

姓苑云本仇氏避難改焉後漢有仇仲

優 五百四二

邵大夫食采優邑子孫因氏焉

憂 五百四三

見姓苑

疇 五百四四

風俗通云摯疇氏之後



儔 五百四五

見姓苑

郵 五百四六

見姓苑 菑人西京雜記公孫弘郡人長倩

尤 五百四七

見姓苑

犖 五百四八

晉大夫郄犖後

謀 五百四九

風俗通云周卿士祭公謀父之後以王父字為氏

緱 五百五十

見姓苑 陳留孝子傳陳留緱氏女名玉 河南官氏

志湯侯氏改為緱氏

勾 五百五一

勾芒氏之胤史記有勾強

不 五百五二

見姓苑 汲郡晉有不準發魏襄王冢得竹簡

巷

五百五三

巷

音浮

纂要云人姓

歐

五百五四

歐冶子吳人善鑄劍

甌

五百五五

東甌王之後也

投

五百五六

郇伯周畿內侯桓王伐鄭投克驅以策其後氏焉漢有

光祿投調

幽

五百五七

見姓苑

摽

五百五八

摽先虬反秦長信侯摽毒

名賢氏族言行類稿卷三十二

欽定四庫全書

名賢氏族言行類稿卷三十三

宋 章定 撰

任 五百六十

姓纂黃帝二十五子十二人以德為姓一為任氏六代至奚仲封師魏有任座秦有任鄙

新序魏文侯問士大夫曰寡人何如君也羣臣皆曰君仁君也翟璜曰君非仁君文侯怒而逐璜至任座曰

君仁君也曰子何以言之對曰臣聞其君仁者其臣直翟璜之言直是以知君仁君也文侯曰善復召璜入拜為上卿

史記任不齊字選楚人孔子弟子

任敖高祖初為御史守豐遷為上黨守封廣阿侯又為御史大夫

後漢任光字伯卿為信都太守獨固城守以拒王郎光武拜為左大將軍封阿陵侯

任隗字仲和光子所得奉祿嘗賑卹宗族位至司空以方正見重於世

循吏任延字長孫十二明詩易春秋太學號為任聖童為九真太守其俗不知牛耕乃令鑄作田器教之墾田百姓充給又教駱越之民嫁娶禮法產子者始知種姓曰使我有是子者任君也多名子為任

儒林任安字定祖少游太學受孟氏易兼通數經又學圖讖究極其術時人稱曰欲知仲桓問任安又曰居

今行古任定祖辟除皆不就

任末字叔本習齊詩遊京師教授十餘年友人董奉德於洛陽病亡末乃躬推鹿車載奉德喪致其墓所

方術任文公明曉天官風角祕要以占術馳名辟司空掾

魏志任峻字伯達太祖每征伐峻常居守以給軍為典農中郎將所在積粟倉廩皆滿每有所陳太祖多善之飢荒之際周急繼富信義見稱



晉書任愷字元褒為侍中有經國之幹萬幾小大多管  
綜之以社稷為已任為吏部尚書子罕字子倫以淑  
行致稱為清平佳士歷黃門侍郎兗州刺史大鴻臚  
隱逸任旭字次龍立標清修不染流俗閉門講習養志  
而已辟為祭酒徵拜給事中並不就

南史任昉字彥升拜太學博士王儉見其文必三復殷  
勤以為當時無輩仕梁官至祕書監為新安太守不  
事邊幅為政清省好獎進士友得其延譽者多見升

擢時人慕之號曰任君及卒殷芸曰哲人云亡儀表  
長謝元龜何寄指南何託

任忠字奉誠平侯景授蕩寇將軍

文學任孝恭讀書一遍諷誦略無所遺掌公家筆翰為  
司文侍郎

北史任祥字延敬和厚有器度隨神武起兵進儀同三  
司位望既重能以寬和接物人士稱之

任果字靜鸞性勇決志在立功歸於周文面陳取蜀之

策授驃騎大將軍

唐任敬臣五歲喪母七歲問父英曰若何可以報母英  
曰揚名顯親可也乃刻志從學任處權見其文驚曰  
此兒信不可及舉孝廉制科擢弘文館學士

任瓌字瑋廬州人早孤伯忠撫愛甚每曰吾子雖多庸  
保耳所以寄門戶者瓌也義師起瓌至龍門請從高  
祖曰公將家子智筭練達論吾此舉其濟乎瓌曰云  
云願為一介使入關宣布威靈以收左輔高祖曰是

吾心也以瓌為招慰大使高祖謂演壽曰閩外事與  
任瓌籌之以功封管國公

任迪簡京兆人擢進士 李景畧表佐其軍

五代任圜京兆三原人也為人明敏善談辨見者愛其  
容止及聞其論議縱橫益皆悚動李嗣昭節度昭義  
辟圜觀察使梁兵築夾城圍潞州踰年而晉王薨晉  
兵救潞者皆解去嗣昭危甚問圜去就之計圜勸嗣  
昭堅守以待不可有二心已而莊宗攻破梁夾城聞

園為嗣昭畫守計甚嘉之由是益知名嗣昭從莊宗  
戰胡柳擊敗梁兵園頗有功莊宗勞之曰儒士亦破  
體耶仁者之勇何其壯也張文禮弑王鎔莊宗遣嗣  
昭討之嗣昭戰歿園代將其軍號令嚴肅吏民以嘗  
乞降皆得保其家族其後以鎮州為北京拜園工部  
尚書兼真定尹北京副留守為政有惠愛明宗時拜  
中書門下平章事後贈太傅

宋朝任中正字慶之曹州濟陰人也少舉進士錢若水

嘗薦其才遷著作郎通判大名府遷江南轉運副使  
真宗即位擢監察御史徙兩浙轉運使民飢中正發  
官廩以賑之知益州代張詠在郡五載遵詠條教人  
用便之拜兵部侍郎叅知政事卒謚曰康懿中正沈  
厚以孝稱於鄉里弟中師

中師字祖聖舉進士張知白薦其才拜右正言累擢右  
諫議大夫出知益州先是轉運使急於課利稅及薪  
芻蔬果之屬中師奏蠲之慶厯初任布守河陽數上

書論事仁宗欲用之中師素見知於呂夷簡謂中師才不在布下遂並召為樞密副使以禮部侍郎資政殿學士知永興軍徙陳州上書自言老臣家曹州願守鄉郡以營休老之計仁宗許之踰月請老以太子少傅致仕卒謚安惠中師性樂易家素饒財雖處通顯自奉甚薄仁宗數賜飛白書及歸休於里中建御書閣鄉人榮之

任布字應之河南人也後唐宰相圜四世孫舉進士為

安肅軍判官因上言河北利害且議敵必大入請飭邊備未幾果有澶淵之後真宗竒之擢提點荊湖南路刑獄權三司鹽鐵判官坐與徐奭試開封進士而奭潛發封卷視之責監鄂州稅務徙知宿鄧建三州梓州路轉運使召還為戶部判官出知真定府有議欲省兵河北者布言今西北二敵包藏禍心以窺伺中國未可以弛備慶厯元年召拜樞密副使歸休洛中作吾知堂以知思知道知命知足幸也卒謚恭惠



方輔政時其子遜嘗上書歷詆大臣亦以其父為不才御史魚周詢因疏布曰不才之迹其子共知然議者以遜詆父為不孝而周詢又引其語以遜布為不知體云

任孜字遵聖眉州人慶厯三年楊冥榜登第與弟師中名於蜀東坡謂之大任小任大任剛烈世無有疾惡如風朱伯厚小任溫毅老更文寬柔慈愛小馮君兩任才行不須說疇昔並友吾先人仕至知富順監

子伯雨

任伯雨字德翁登進士第元符三年自太宗正丞除右  
正言建中靖國元年論章惇蔡卞等誣謗宣仁崇寧  
元年坐黨論除名貶通州二年再貶昌化軍紹興五  
年子申先為起居郎上伯雨手澤論章惇蔡卞誣謗  
宣仁后有廢立之意上曰朕嘗親承元祐之訓乃下  
詔比覽元符諫臣任伯雨疏論章惇蔡卞詆誣宣仁  
聖烈太后欲追廢為庶人誰無母慈何忍至此賴哲

宗聖明不從使其言施用豈不蔑太母九年保佑之  
勲累泰陵終身仁孝之德可追貶惇等子孫不得除  
在內職任

任汲字師中慶厯六年賈黯榜登第東坡謂之小任嘗  
為齊安令其民愛之因買田以居通判黃州郡人德  
之為作師中菴任公亭蘇轍作師中菴記後知廬州  
不主開邊之議東坡詩任公鎮西南嘗贈繞朝策當  
時若盡用善陣無赫赫秦觀作墓誌孫諒

任諒字子諒十四歲應蔡州舉魁其選登進士第歷官至龍圖閣直學士九持使節三建師閫徽宗有事於燕山以內祠修國史建言耶律氏不當滅絕以為棄可存之北虜鄰崛起之金國難易百倍又論郭樂師有必反之勢中原有瓦解之憂童貫蔡京以為狂疾徽宗獨嘉之御札曰以剛直自信朕所簡知李昉志其墓國史有傳曾孫希夷

陰 五百六一

姓纂周文王第三子管叔鮮之後管夷吾七代孫修  
適楚為陰大夫因氏焉風俗通又云陰康氏之後周  
有陰不佞陰里人也 南陽新野漢末居焉陰子方  
子公有祀竈之祥者也至衛尉陰典孫鄰女為光武  
皇后生明帝鄰子識金吾孫剛女為和帝皇后

後漢陰識字次伯光烈皇后之母兄其先出管仲七世  
孫修自齊適楚為陰大夫因而氏焉 光武時遷侍

中 後守執金吾輔導東宮常留鎮守京師帝敬重

之常指識以勅戒貴戚激厲左右

後漢陰興識之弟字君陵 為黃門侍郎甚見親信

拜衛尉輔導太子 顯宗詔曰興輔導朕躬有周昌

之直在家仁孝有曹閔之行以其子慶為鮦陽侯恂

恂苗裔傳龜襲紫 宣帝時陰子方者臘日晨炊而

竈神形見家有黃羊因以祀之自是暴至巨富有田

七百餘頃

南史陰子春字幼文 仕梁遷梁秦二州刺史 雖無

他才行臨人以廉潔稱 子鏗字子堅博涉史傳尤  
善五言詩當時所重為法曹叅軍

北史陰壽字羅雲少果烈有武幹以平尉遲迴之功拜  
幽州總管 子世師少有節槩隋時拜張掖太守深  
為戎狄所憚

岑 五百六二

姓纂呂氏春秋云周文王封異母弟耀之子渠為岑  
子其地也今梁國岑亭是也

後漢岑彭字君然南陽人拜刺姦大將軍督察衆營又  
遷征南大將軍裝直進樓船冒突露橈數千艘以進  
攻公孫述首破荆門長驅武陽持軍整齊秋毫無  
犯蜀人為立廟武陽玄孫熙為魏郡太守招聘  
隱逸與叅政事無為而化視事二年與人歌之曰我  
有枳棘岑君伐之我有蝨賊岑君遏之狗吠不驚足  
下生氈含哺鼓腹焉知凶災我喜我生獨丁斯時美  
哉岑君於戲休茲



黨錮岑晊字公孝南陽人有幹國器雖在閭里慨然有  
董正天下之志 太守成瑨請為功曹 郡中謠曰

南陽太守岑公孝弘農成瑨但坐嘯

南史文學岑之敬字思禮年十六策春秋左氏擢為高  
第博涉文史雅有詞筆 接引後進恂恂如也 士  
君子以篤行稱之

唐岑文本字景仁鄧州人父之象坐訟不得申文本年  
十四詣司隸理冤辨對哀暢無所詘衆命作蓮華賦

文成合臺嗟賞遂直 性沈敏有姿儀善文辭除祕  
書郎太宗既藉田又元日朝羣臣文本奏藉田三元  
頌二篇文致華贍 擢中書舍人時顏師古為侍郎  
詔誥皆所草定及得文本號善職而敏速過之 時  
魏王泰有寵侈第舍文本上疏勸崇節儉帝善之  
踰年為令從伐遼東事一委倚籌不廢手 自以興  
孤生居處卑室事母孝生平故人雖羈賤必鈞禮  
始為中書令有憂色母問之答曰非勲非舊責重位

高所以憂也有來慶者輒曰今日受弔不受賀或勸  
營產業文本歎曰吾漢南一布衣以文墨位宰相奉  
秩已重尚何殖產業耶

岑羲字伯華

文本之孫也

第進士遷金壇令弟仲翔為長洲

令仲休為溧水令皆有治績宰相宗楚客語本道巡

察御史母遺江東三岑時兄獻為國子司業仲翔

陝州刺史仲休商州刺史兄弟子姪在清要者數十

人

岑長倩少孤為文本鞠愛孫文昌右相封鄧國公 和  
州浮屠上大雲經后詔立大雲寺長倩爭不可 號

陳留八俊

金

五百六三

姓纂少昊金天氏之後見風俗通 京兆漢秬侯金  
日磾匈奴休屠王子也

前漢金日磾字翁叔本降虜累遷光祿大夫 既親近  
未嘗有過失 母教誨兩子甚有法度 著忠孝節

自在左右目不忤視者數十年自輔少主封柁侯

兩子賞建俱侍中弟倫倫子安上

安上字子侯少為侍中惇篤有智子敞為侍中為人

正直敢犯顏色左右憚之子涉為侍中明經節儉

諸儒稱之從父弟欽舉明經為京兆尹帝選置

師友以京兆尹金欽家世忠孝為金氏友贊曰日碑以

篤敬寤主忠信自著世名忠孝七世內侍

北史金祚字仲敬性驍勇尚氣俠魏末以軍功至大中

大夫

林

五百六四

姓纂殷太丁之後王子比干之子比干為紂所戮其  
子堅逃難長林之山遂姓林氏魯有林放仲尼弟子  
左傳林雍林不狃林楚代仕季氏左傳曰林楚之先  
皆季氏之良也 齊有林阮見說苑林類見列子  
林回見莊子號十德之門又居九門見戚苑子孫秦  
末居齊郡鄒縣漢分齊郡置濟陽遂為郡人

論語林放問禮之本子曰大哉問

左傳定公八年林楚御桓子桓子謂楚曰而先對曰不敢愛死

唐林攢泉州人母亡水漿不入口五日自挺臂作冢廬其右有白鳥來甘露降詔作二闕於墓前時號闕下林家

林蘊字復夢泉州人父披字茂彥以臨汀多山鬼淫祠民厭苦之撰無鬼論蘊世通經西川節度使韋臯辟

推官劉闢反蘊曉以逆順不聽復遺書切諫闢怒械於獄將就刑大呼曰危邦不入亂邦不居得死為幸矣闢惜其直陰戒刑人抽劍磨其頸以脅服之蘊叱曰死即死我項豈頑奴砥石耶闢知不可服捨之

李吉甫李絳武元衡為相蘊貽書諷之 蘊辨給嘗

有姓崔者矜氏族蘊折之曰崔子弑齊君林放問禮之本優劣何如其人俯首不能對

林士弘饒州人



宋朝林希福州人也舉進士紹聖初知成都府哲宗親政留為中書舍人時方推明紹述盡黜元祐羣臣自呂大防劉摯蘇軾蘇轍等書命皆希為之初章惇用事嘗曰元祐初司馬光作相用蘇軾掌制所以能鼓動四方安得斯人而用之或曰希可遂遷中書舍人林攄字彥振福州長樂人也以父任調無錫簿為敕令所刪定官擢中書舍人翰林學士時朝廷用兵西方遼人遣使為請命攄報聘及辭北主欲為夏人求復

進築城砦據曰北朝往日夏人不庭亦嘗取唐隆鎮  
今還之乎據不勝其忿既還館紿以宣旨使降階跪  
受實以國書授之據引故事不從因力詆之事聞北  
主曰大宋兄弟之邦臣吾臣也今辱吾左右與辱我  
同欲致之死在廷恐兆釁皆泣諫止於是留據在館  
三日絕供餉水泉汙不潔以饑渴困辱之既行無燕  
餞贈賄使還朝廷不以據生事為罪乃除禮部尚書  
遼人以書言於朝遂出知潁州未幾召為開封尹拜

同知樞密院事改尚書左丞遷中書侍郎

林敏功字子仁蘄春人治春秋年十六預鄉薦下第歸  
歎曰軒冕富貴非吾所樂杜門不出者二十年該通  
六經貫穿百氏尤長於詩元符末蔡元度被召經過  
訪之愛其蓬戶樞牖安貧樂道力薦於上詔蘄州以  
禮敦遣子仁遁於山間卒不奉詔張天覺徐澤之來  
守是邦皆尊禮之政和間郡守林震謂同僚曰吾宗  
有德君子旬日一出郊見之震還朝舉其隱德賜號

高隱處士朝散大夫旌表門閭子仁稱疾不受告有  
旨守令率鄉黨親戚耆老親臨勸諭子仁不得辭謝  
表略曰自是難陪英雋之遊奚敢妄意高尚之事卧  
牛衣而待旦寒如之何搔鶴髮以興懷老其將至又  
云守令親臨賓友咸集諭臣以雨露之澤俱可均霑  
戒臣以雷霆之威不宜輕忤有詩文千餘篇名松坡  
集

林逋字君復杭州錢塘人也少孤立志為學結廬西湖

之孤山喜為詩孤峭澄淡居西湖二十年足未嘗履  
城市薛映李及在杭州每造其居清談終日而去逋臨  
終有詩云湖上青山對結廬墳前修竹亦蕭疎茂陵  
他日求遺草猶喜曾無封禪書卒賜謚曰和靖先生  
林大禹字梅卿莆田人也其先世居澄渚與闕下為同  
族號九牧林家擢進士第歷官諫議大夫吏部尚書  
林光朝嘗誌其墓

林正唐九牧之孫也自澄渚遷於仙遊石磧正唐釋褐

登第官終左司郎中子一飛官至戶部侍郎一鳴字  
聞知歷官至樞密院檢詳諸房文字還家棲遲幾三  
十載尋知黃州移常德卒子澧今為崇安令尹廉靜  
不擾民甚稱之

林光朝字謙之莆田人弱歲再下第不復以得失為意  
遂專心聖賢踐履之學窮經討古浩然自得晚始登  
仕版在詞掖多所論駁不得其言而歸卒丞相陳正  
獻公以詩哭之曰出為嶺嶠澄清使歸作甘泉侍從

臣百擔有書行李重千金無產橐中貧經旬把臂言  
猶在昨日題詩墨尚新清曉訪君呼不起寢門一慟  
淚沾襟艾軒先生祠堂在興化城南

林枏字子房莆田人也父孝澤仕終廣東提刑枏紹興  
間中進士第嘗為吏部郎出知福州卒人物志云雖  
身不登禁從而將節分閩所至有聲真賢父子哉

臨 五百六五

臨八凱大臨之後 東海石趙秦州刺史臨深隋日者

儀同孝恭京兆人也

黔  
五百六六

黔禮記齊有黔敖婁先生隱者

尋  
五百六七

古斟尋氏之後晉有尋魯河內晉東海王屬尋魯隋末  
有尋相尉遲敬德裨將

鄒  
五百六八

斟鄒氏之後亦作尋古傳周有鄒盼也



𦔻 五百六九

𦔻 音尋 見纂要文

侵 五百七十

見姓苑 扶風三輔決錄有扶風太守侵恭因氏焉

𦔻 五百七一

𦔻 音尋 又音淫 後漢有𦔻顯 廣漢蜀志有太常𦔻丞漢又

有廷尉𦔻政

𦔻 五百七二

夏諸侯斟灌斟尋氏之後以國為氏焉並祝融之後國語注曰曹姓之別也

箴

五百七三

見姓苑蓋楚大夫箴尹克黃之後子孫以官為姓

柳

五百七四

其先楚懷王孫心號義帝都柳子孫氏焉晉有柳實又江夏陶侃別傳柳寶代居江夏

欽

五百七五

見姓苑

叅

五百七六

陸終二子曰叅胡之後見代本

復

五百七七

古叅字見纂要云人姓

霽

五百七八

霽古陰字纂要云人姓

禽

五百七九

魯大夫禽鄭高氏士傳有禽慶孝子傳有禽賢

琴

五百八十

家語仲尼弟子琴牢字子開一名張衛人也亦見左傳

嚴

五百八一

姓纂芊姓楚莊王支孫以謚為姓楚有莊周漢武彊

侯莊不識孫青翟丞相會稽莊忌夫子生助 後漢

莊光避明帝諱並改為嚴氏 馮翊稱翟之後代居

馮翊魏郃陽侯嚴稜又徙華陰

前漢嚴助會稽人嚴夫子忌之子也 舉賢良對策百

餘人武帝善助對擢為中大夫 侍燕從容上問助

居鄉里時對曰家貧為友壻所辱願為會稽太守於

是拜為會稽太守厭承明之廬勞侍從之事懷故土

出為郡吏願奉三年計最 留侍中有奇異輒使為

文

嚴安臨苗人上書言世務上召見謂曰公安在何相見

之晚也拜為郎中

儒林嚴彭祖字公子東海人 顯門教授 公羊春秋

有嚴氏之學 為太子太傅廉直不事權貴或說曰  
君以不修小禮曲意亡貴人左右之助經誼雖高不  
至宰相願少自勉強答曰凡通經術固當修行先王  
之道何可委曲從俗苟求富貴乎

酷吏嚴延年字次卿東海人 少學法律舉侍御史朝  
廷肅焉敬憚位為涿郡太守吏皆股弁道不拾遺遷  
河南太守所在摧折豪強扶助貧弱 河南號曰屠

伯母責其治郡不仁 兄弟五人皆有吏才至大官  
東海號其母曰萬石嚴嫗

後漢嚴光字子陵會稽餘姚人與光武同遊學光武即位物色訪之後齊國上言有一男子披羊裘釣澤中帝遣使聘之三反而後至侯霸與光素舊遣使奉書光不答乃口授曰君房足下位至鼎足甚善懷仁輔義天下悅阿諛順旨要領絕帝因共偃卧光以足加帝腹上明日太史奏客星犯御座除諫議大夫不屈

乃耕於富春山後人名其釣處為嚴陵瀨

吳志嚴畯字曼才少耽學善詩書左氏禮 孫權以其

督兵萬人畯固辭曰樸素書生不閑軍事非才而據

咎悔必至 不畜祿賜皆散之親故家常不充 終

於尚書令

杜有道妻嚴氏字憲貞淑有識量十八而嫁居撫育二

子教以禮度

南史儒林嚴植之字孝源 後為康樂令在縣清白人



吏稱之 仕梁兼五經博士每當登講五館生畢至  
在閤室未嘗怠

孝義嚴世期有司奏榜其門曰義行嚴氏之門

北史嚴稜 太武以其歸化之功除中山太守有清廉

稱

見毛脩  
之傳

唐嚴挺之名浚莘州人資質軒秀舉進士并擢制科調  
義興尉號材吏姚崇為刺史異之執政引為右拾遺  
開元中進給事中典貢舉時號平允改濮汴二州刺

史所治皆嚴威吏至重足 宰相張九齡雅知之用  
為尚書左丞知吏部選

嚴武字季鷹挺之子幼豪爽母裴不為挺之所答獨厚  
其妾英武始八歲奮然以鐵鉞就英寢碎其首左右  
驚白挺之曰郎戲殺英辭曰安有大臣厚妾而薄妻  
者兒故殺之非戲也父奇之曰真嚴挺之子敕武讀  
書擢成都尹充劍南節度使始用房琯薦為給事  
中後琯以前宰相為巡內刺史武不為禮最厚杜甫

前後欲殺甫數四李白為蜀道難者乃為房與杜危之也永泰初卒母曰而今而後吾知免為官婢矣

嚴綬

挺之從孫也

擢進士第副劉贊為宣歙團練使總留事

憲宗立楊惠琳劉闢反綬請選銳兵討賊二賊平檢校左僕射在鎮九年尚寬惠吏事有方略

嚴震梓州人本農家子乾元中數出貲助邊得為州長史遷興鳳兩州團練使好興利除害建中中劍南黜陟使韋棣狀震治行為山南第一乃賜上下考治鳳

十四年號稱清嚴遠近咨美 遷山南西道節度使  
震隨宜勸課鳩歛有法民不煩擾詔改梁州為興元  
府用震為尹

廉 五百八二

姓纂顓頊曾孫大廉之後以王父字為氏趙有廉頗  
史記廉頗趙之良將也破齊拜為上卿以勇氣聞於諸  
侯有攻城野戰之大功 肉袒負荊謝罪於藺相如  
後漢廉范字叔度京兆人 遷蜀郡太守百姓歌曰廉

叔度來何暮不禁火民安作昔無襦今五袴

南 五百八三

姓纂周宣王時南仲之後魯有南蒯南遺又孟僖子  
生南宮敬叔家語作南宮縚仲尼弟子或單姓南氏  
南宮縚字子容妻仲尼兄孟皮女也

論語南容邦有道不廢邦無道免於刑戮又南容三復  
白圭孔子以其兄之子妻之

左傳隱公九年天王使南季來聘

昭公十二年季平子立而不禮於南蒯蒯謂子仲吾出季氏而歸其室於公我以費為公臣

南蒯魯季氏費邑宰也

唐南霽雲少微賤張巡被安祿山圍築臺募萬死一生者數日無敢應俄有暗鳴而來乃霽雲也善騎射見賊百步內乃發無不應弦斃

閻

五百八四

姓纂周太王之胤武王封泰伯曾孫仲弈於閭鄉因

氏焉一云唐叔虞之後公族有食采於閭邑因氏焉  
晉有閭嘉齊有閭職滎陽狀始晉成公子懿食  
采於閭因氏焉

左傳莊公十八年楚武王克權使鬬緡尹之以叛圍而殺  
之遷權於那處使閭敖尹之

昭公九年周甘人與晉閭嘉爭閭田

魏志閭溫字伯儉以涼州別駕遷上邽令立忠節

晉閭續字續伯博覽墳典 事繼母彌謹 才堪佐著

亦屢上疏 朝廷善其忠烈擢漢中太守 不護細  
行而慷慨好大節

閻鼎字台成初行豫州刺史後為太子詹事見殺

北史閻慶字仁慶 父進有謀略勇冠當時拜龍驤將  
軍仁慶善於綏撫能盡士卒死力屢獲勲勞遷驃騎  
大將軍歷雲寧二州刺史性寬和不苛察百姓悅之  
子毗篆書草隸為當時之妙

孝行閻元明少而至孝行著鄉閭 詔下表為孝門復



其租調兵役

循吏閻慶胤為敷城太守頻年飢儉歲常以家粟千石賑恤貧窮人賴以濟部下一千餘人申誦美政

唐閻讓字立德京兆人與弟立本皆機巧有思武德初遷尚衣奉御制袞冕等咸有典法貞觀初拜大匠造浮海大航五百艘遂從征遼

閻立本總章元年拜右相初太宗與侍臣泛舟春苑池見異鳥容與波上悅之詔坐者賦詩而召立本侔狀

閣外傳呼畫師閭立本是時已為主爵郎中俯伏池  
左研吮丹粉望坐者羞慚流汗歸戒其子曰吾少讀  
書文辭不減儕輩今獨以畫師召與厮役等若曹慎  
毋習然性所好雖被訾屈亦不能罷也既輔政但以  
應務俗材無宰相器時姜恪以戰功擢左相故時人  
有左相宣威沙漠右相馳譽丹青之嘲

甘 五百八五

姓纂風俗通甘夏時侯國也以國為氏一云周武王

同姓於畿內為諸侯因氏焉甘伯恒公是也又周封  
王子帶於甘昭公使也殷有甘盤秦有甘茂甘羅見  
史記

新序秦武王欲使甘茂伐韓宜陽以通道至周室甘茂  
曰請約魏伐韓

新序秦孝公欲用衛鞅之言變法甘龍曰聖人不易民  
而教知者不變法而治

左傳文公十七年秋周甘歇敗戎於邠垂

史記甘茂下蔡人也學百家之說為秦左丞相

甘羅茂之孫也年十二事秦相呂不韋不韋言於始皇  
曰甘羅年少耳然名家之子孫諸侯皆聞之 秦以  
為上卿 太史公曰甘茂起下蔡閭閻顯名諸侯重  
強齊楚甘羅年少然出一奇計聲稱後世雖非篤行  
之君子然亦戰國之策士也

前漢甘延壽字君況北地人少以良家子善騎射為羽  
林投石拔距絕於等倫 以材力愛幸 斬郅支單

于封義成侯

吳志甘寧字興霸開爽有計略拜折衝將軍建方略  
以擒黃祖破曹公於烏林攻曹仁於南郡江表  
之虎臣也

晉書甘卓字季思察孝廉舉秀才拜豫章太守遷梁  
州刺史鎮襄陽為政簡惠善於綏撫估稅悉除市無  
二價西土稱為惠政

譚五百八六

姓纂譚子國在齊州平陵縣西南為齊所滅譚子奔  
莒子孫氏焉

南史孝義譚弘寶四世同居詔表門閭蠲租稅

譚世勣字彥成長沙人也舉進士又中詞學兼茂科為  
徽猷閣待制知婺州未行復留是歲彗出東方大臣  
云此乃夷狄將衰非中國憂也世勣面奏垂象可畏  
當修德應天不宜惑諛說遷給事中兼侍讀何臬建  
言分天下為四道各置都總管世勣曰裂天下付四

人而王畿所自治者纔十六縣爾獨無不掉之虞乎  
大拂臬意改禮部侍郎時虜騎浸南牧為城守備甚  
急世勣曰守邊為上策今邊不得守守河則畿甸自  
固中策也巡幸江淮會東南兵四面扞虜下策也既  
而河上無守兵虜乘虛得度盡歛士卒入城世勣又  
言遣京畿大將秦元以所統保甲分四砦直國門使  
兵勢連屬首尾相援即虜不敢逼孫傳深然之又格  
於臬議及邦昌僭位令直學士院世勣堅卧不起邦

昌知不可奪乃已卒贈端明殿學士

詹  
五百八十七

詹大卿體仁家譜曰詹姓始於周宣王支子賜姓曰詹封為詹侯其後有詹父為周大夫詹嘉處瑕以守桃林之塞姓纂曰楚詹尹之後有詹何善釣昭公九年有詹桓伯辭於晉

唐詹洗者為福州侯官令子名豪移家建之建陽生五子一居嚴陵一居信城一居太末娶女之間留武夷



者其二子焉唐時有肇為御史中丞洗馬侍御史宋

朝則有庠為工部侍郎

王隨之壻

範知惠州從東坡先生

游先生嘗有次韻桂酒二詩特升為提舉福建茶監

公薦靖康間官京師張邦昌迫以偽命不受逃歸高

宗即日召對奏北事甚詳上喜曰卿忠臣也擢太常

丞遷祠部外郎休仁開禧間嘗以司農卿總餉湖廣

淵字景憲登慶元己未第稟字德寬登嘉泰壬戌第

稟之子甫乙丑毛榜繼登科皆二子之下也

詹騏字晉卿淳熙乙未擢進士第一人詹儀之字體仁  
卒未趙遠榜登科官終侍郎詹大和字甄老政和間  
擢第嘗為水部外郎轉漕淮南和江處撫三州詹良  
臣字唐公以累舉恩補官為縉雲尉方臘犯境立忠  
節徽宗官其二子詹適嘗為御史臺主簿東坡先生  
有和詹適飲巽亭詩云江上同三黜天涯又一樽  
右五公定得之詹淵景憲云皆豪之後也

占 五百八八

陳不占之後以王父字為氏

蕪 五百八九

風俗通衛太子蕪之後

潛 五百九十


見姓苑 臨川姓苑云今臨川有潛氏

鍼 五百九一

左傳魯大夫鍼巫鍼季

苦 五百九二

左傳季氏臣苦夷也



名賢氏族言行類稿卷三十三